

RIALACHÁN CUR CHUN FEIDHME (AE) 2021/127 ÓN gCOIMISIÚN
an 3 Feabhra 2021

lena leagtar síos na ceanglais chun ábhar pacáistíochta adhmaid a thabhairt isteach i gcríoch an Aontais chun tráchtearraí áirithe de thionscnamh tríú tíortha áirithe a iompar agus chun seiceálacha sláinte plandaí a dhéanamh ar ábhar den sórt sin, agus lena n-aisghairtear Cinneadh Cur Chun Feidhme (AE) 2018/1137

TÁ AN COIMISIÚN EORPACH,

Ag féachaint don Chonradh ar Fheidhmiú an Aontais Eorpaigh,

Ag féachaint do Rialachán (AE) 2016/2031 ó Pharlaimint na hEorpa agus ón gComhairle an 26 Deireadh Fómhair 2016 maidir le bearta cosanta i gcoinne lotnaidí plandaí, lena leasaítear Rialacháin (AE) Uimh. 228/2013, (AE) Uimh. 652/2014 agus (AE) Uimh. 1143/2014 ó Pharlaimint na hEorpa agus ón gComhairle agus lena n-aisghairtear Treoracha 69/464/CEE, 74/647/CEE, 93/85/CEE, 98/57/CE, 2000/29/CE, 2006/91/CE agus 2007/33/CE ón gComhairle ⁽¹⁾, agus go háirithe Airteagal 41(3) de,

Ag féachaint do Rialachán (AE) 2017/625 ó Pharlaimint na hEorpa agus ón gComhairle an 15 Márta 2017 maidir le rialuithe oifigiúla agus gníomhaíochtaí oifigiúla eile arna ndéanamh lena áirithiú go gcuirfear i bhfeidhm dlí an bhia agus na beatha, rialacha maidir le sláinte agus leas ainmhithe, sláinte plandaí agus táirgí cosanta plandaí, lena leasaítear Rialacháin (CE) Uimh. 999/2001, (CE) Uimh. 396/2005, (CE) Uimh. 1069/2009, (CE) Uimh. 1107/2009, (AE) Uimh. 1151/2012, (AE) Uimh. 652/2014, (AE) 2016/429 agus (AE) 2016/2031 ó Pharlaimint na hEorpa agus ón gComhairle, Rialacháin (CE) Uimh. 1/2005 agus (CE) Uimh. 1099/2009 ón gComhairle agus Treoracha 98/58/CE, 1999/74/CE, 2007/43/CE, 2008/119/CE agus 2008/120/CE ón gComhairle, agus lena n-aisghairtear Rialacháin (CE) Uimh. 854/2004 agus (CE) Uimh. 882/2004 ó Pharlaimint na hEorpa agus ón gComhairle, Treoracha 89/608/CEE, 89/662/CEE, 90/425/CEE, 91/496/CEE, 96/23/CE, 96/93/CE agus 97/78/CE ón gComhairle agus Cinneadh 92/438/CEE ón gComhairle ⁽²⁾, agus go háirithe Airteagal 22(3) agus Airteagal 52 de,

De bharr an mhéid seo a leanas:

- (1) Foráiltear le Cinneadh Cur Chun Feidhme (AE) 2018/1137 ón gCoimisiún ⁽³⁾ do sheiceálacha sláinte plandaí agus do bhearta atá le déanamh maidir le hábhar pacáistíochta adhmaid atá in úsáid in iompar tráchtearraí sonraithe de thionscnamh na Bealarúise agus na Síne agus bhí sé infheidhme go dtí an 30 Meitheamh 2020. Bhí feidhm ag na rialacha sin i dteannta na rialacha atá i Rialachán Tarmilgthe (AE) 2019/2125 ón gCoimisiún ⁽⁴⁾ maidir le rialuithe oifigiúla sonracha ar ábhar pacáistíochta adhmaid.
- (2) Maidir le seiceálacha sláinte plandaí arna ndéanamh ag Ballstáit ar bhonn Chinneadh Cur Chun Feidhme (AE) 2018/1137, tá sé léirithe iontu nach gcomhlíonann an mharcáil ar ábhar pacáistíochta adhmaid, a úsáidtear in iompar tráchtearraí áirithe de thionscnamh na Bealarúise agus na Síne, Rialachán (AE) 2016/2031 i gcónaí. Thairis sin, maidir le seiceálacha sláinte plandaí arna ndéanamh ag Ballstáit ar bhonn a measúnuithe riosca, arna dtaifeadadh in TRACES agus i gcóras gréasáin EUROPHYT-Idircheaptha roimhe seo, tá sé léirithe iontu nach gcomhlíonann an mharcáil ar ábhar pacáistíochta adhmaid a úsáidtear chun tráchtearraí áirithe de thionscnamh na hIndia a iompar an Rialachán sin i gcónaí.
- (3) Is éard a léirítear leis neamhchomhlíonadh ar tháinig na Ballstáit orthu go bhfuil riosca ann go dtabharfar lotnaidí beo isteach leis an ábhar pacáistíochta adhmaid a úsáidtear chun tráchtearraí áirithe ó na trí thír thionscnaimh sin a iompar, eadhon an Bhealarúis, an tSín agus an India, agus gur cheart na tráchtearraí sin a bheith faoi réir seiceálacha sonracha.
- (4) Chun na hiarmhairtí a bhaineann le neamhchomhlíonadh den sórt sin a chosc amach anseo, ba cheart bearta a ghlacadh maidir le hábhar pacáistíochta adhmaid chun tráchtearraí áirithe de thionscnamh na Bealarúise, na Síne agus na hIndia a iompar.

⁽¹⁾ IO L 317, 23.11.2016, lch. 4.

⁽²⁾ IO L 95, 7.4.2017, lch. 1.

⁽³⁾ Cinneadh Cur Chun Feidhme (AE) 2018/1137 ón gCoimisiún an 10 Lúnasa 2018 maidir le maoirseacht, seiceálacha sláinte plandaí agus bearta atá le glacadh i dtaca le hábhar pacáistíochta adhmaid le haghaidh iompar tráchtearraí de thionscnamh tríú tíortha áirithe (IO L 205, 14.8.2018, lch. 54).

⁽⁴⁾ Rialachán Tarmilgthe (AE) 2019/2125 ón gCoimisiún an 10 Deireadh Fómhair 2019 lena bhforlíontar Rialachán (AE) 2017/625 ó Pharlaimint na hEorpa agus ón gComhairle a mhéid a bhaineann le rialacha maidir le rialuithe oifigiúla sonracha a chur i bhfeidhm ar ábhar pacáistíochta adhmaid, fógra a thabhairt faoi choinsínachtaí áirithe agus bearta a bheidh le déanamh i gcás neamhchomhlíonta (IO L 321, 12.12.2019, lch. 99).

- (5) Chun a áirithiú go n-ullmhófar na húdaráis a dhéanann na seiceálacha sláinte plandaí faoi seach ar bhealach níos fearr, ba cheart do na húdaráis inniúla nó do na hoibreoirí a bhfuil baint acu le hallmhairiú na dtráchtearraí sonraithe, a bhfuil ábhar pacáistíochta adhmaid ag gabháil leo, réamhfhógra ina thaobh sin a thabhairt don údarás inniúil ag post rialaithe teorann an chéad teacht isteach a luaite is eol dóibh gur tháinig an phacáistíocht adhmaid sin isteach.
- (6) Ba cheart ábhar pacáistíochta adhmaid de choinsíneachtaí na dtráchtearraí sonraithe a bheith faoi réir seiceálacha sláinte plandaí ar bhonn rialta. Bunaithe ar an riosca sainaitheanta do shláinte plandaí, níor cheart ráta na seiceálacha sin a bheith níos lú ná 15 % d'ábhar pacáistíochta adhmaid allmhairithe na dtráchtearraí sonraithe, chun a áirithiú go seiceálfar sampla ionadaíoch.
- (7) Ba cheart an t-ábhar pacáistíochta adhmaid, mar aon leis na coinsíneachtaí sonraithe, a bheith faoi réir rialacha an Aontais maidir le maoirseacht chustaim go dtí go gcuirfear na seiceálacha ar shláinte plandaí i gcrích, chun a áirithiú nach mbeidh aon riosca fiteashláintíochta ann mar thoradh ar a saorghluaiseacht laistigh de chríoch an Aontais.
- (8) Ba cheart seiceálacha sláinte plandaí a dhéanamh ag post rialaithe teorann an chéad teacht isteach i gcríoch an Aontais nó ag pointí rialaithe dá dtagraítear i bpointe (a) d'Airteagal 53(1) de Rialachán (AE) 2017/625, chun a áirithiú go ndéantar na seiceálacha sin sna saoráidí is iomchuí.
- (9) Ar mhaithe leis an tsoiléireacht dhlíthiúil, ba cheart Cinneadh Cur Chun Feidhme (AE) 2018/1137 a aisghairm agus an Rialachán seo a chur ina ionad, chun Rialachán (AE) 2016/2031 agus Rialachán (AE) 2017/625 is infheidhme ón 14 Nollaig 2019 a chur san áireamh.
- (10) Chun go mbeidh dóthain ama ag na Ballstáit oiriúnú do na ceanglais dá bhforáiltear sa Rialachán seo, ba cheart feidhm a bheith aige ón 1 Márta 2021.
- (11) Ba cheart feidhm a bheith ag an Rialachán seo go dtí an 31 Nollaig 2023 chun am a thabhairt chun faireachán a dhéanamh ar an gcás agus chun comhlíonadh an ábhair pacáistíochta adhmaid agus na gcoinsíneachtaí faoi seach leis an Rialachán seo agus Rialachán (AE) 2016/2031 a chinneadh.
- (12) Tá na bearta dá bhforáiltear sa Rialachán seo i gcomhréir leis an tuairim ón mBuanchoiste um Plandaí, Ainmhithe, Bia agus Beatha,

TAR ÉIS AN RIALACHÁN SEO A GHLACADH:

Airteagal 1

Ábhar agus raon feidhme

Leis an Rialachán seo, leagtar amach ceanglais maidir le hábhar pacáistíochta adhmaid tráchtearraí áirithe ó thríú tíortha a liostaítear san Iarscríbhinn a thabhairt isteach i gcríoch an Aontais agus seiceálacha sláinte plandaí a dhéanamh air, chun a áirithiú go gcomhlíonann sé Rialachán (AE) 2016/2031.

Airteagal 2

Sainmhínithe

Chun críocha an Rialacháin seo, beidh feidhm ag na sainmhínithe seo a leanas:

- (1) ciallaíonn “ábhar pacáistíochta adhmaid” aon táirge adhmaid i bhfoirm cásanna pacála, boscaí, cliathbhoscaí, drumaí agus pacáistithe comhchosúla, sráideoga, sráideoga bosca agus boird ualaigh eile, coiléir sráideoige, starrála, bídís in úsáid in iompar réad de gach cineál nó ná bídís; ní chuirtear san áireamh adhmaid amh atá 6 mm nó níos lú ar tiús, adhmaid próiseáilte arna tháirgeadh le gliú, teas ná brú, nó meascán díobh sin, ná starráil lena dtacaítear le coinsíneachtaí adhmaid, atá déanta as adhmaid den chineál céanna agus den cháilíocht céanna leis an adhmaid atá sa choinsíneacht;

- (2) ciallaíonn “coinsíneachtaí sonraithe” coinsíneachtaí a chomhlíonann gach ceann de na nithe seo a leanas:
- (a) is de thionscnamh na dtríú tíortha a liostaítear san Iarscríbhinn iad;
 - (b) tacaítear leo le hábhar pacáistíochta adhmaid, cosnaítear iad le hábhar pacáistíochta adhmaid nó iompraítear in ábhar pacáistíochta adhmaid iad go dtí ar a laghad post rialaithe teorann an chéad teacht isteach;
 - (c) tá na cóid Ainmníochta Comhcheangailte (AC) nó cóid TARIC faoi seach acu, agus na tuairiscí faoi seach a leagtar síos in Iarscríbhinn I a ghabhann le Rialachán (CEE) Uimh. 2658/87 ón gComhairle ⁽⁵⁾, mar a liostaítear san Iarscríbhinn.

Airteagal 3

Ceanglais chun ábhar pacáistíochta adhmaid a thabhairt isteach i gcríoch an Aontais

Ní fhéadfar ábhar pacáistíochta adhmaid a thabhairt isteach i gcríoch an Aontais ach amháin má chomhlíontar an dá cheanglas seo a leanas:

- (1) maidir leis na húdaráis inniúla nó na hoibreoirí atá freagrach as an ábhar pacáistíochta adhmaid lena mbaineann a thabhairt isteach nó atá ar an eolas gur tháinig an phacáistíocht adhmaid sin isteach i gcríoch an Aontais, go dtabharfaidh siad réamhfhógra don údarás inniúil ag post rialaithe teorann an chéad teacht isteach agus an t-ábhar pacáistíochta adhmaid lena mbaineann á thabhairt isteach i gcríoch an Aontais;
- (2) go léirítear leis na seiceálacha sláinte plandaí dá bhforáiltear i bpointe (a) d’Airteagal 4(1) den Rialachán seo go gcomhlíonann an t-ábhar pacáistíochta adhmaid lena mbaineann ceanglais phointí (a) agus (b) d’Airteagal 43(1) de Rialachán (AE) 2016/2031.

Airteagal 4

Seiceálacha sláinte plandaí

- 1. Déanfaidh na húdaráis inniúla an méid seo a leanas:
 - (a) seiceálacha sláinte plandaí a dhéanamh, ar bhonn rialta, ar ábhar pacáistíochta adhmaid de choinsíneachtaí na dtráchtearraí sonraithe ag ceann amháin de na pointí seo a leanas:
 - (i) post rialaithe teorann an chéad teacht isteach i gcríoch an Aontais;
 - (ii) pointí rialaithe dá dtagraítear i bpointe (a) d’Airteagal 53(1) de Rialachán (AE) Uimh. 2017/625;
 - (b) ráta na seiceálacha ar shláinte plandaí dá bhforáiltear i bpointe (a) den mhír seo a shainmhíniú.
- 2. Ní bheidh an ráta dá dtagraítear i bpointe (b) de mhír 1 níos lú ná 15 % de choinsíneachtaí na dtráchtearraí sonraithe.
- 3. Go dtí go gcuirfear na seiceálacha dá bhforáiltear i bpointe (a) de mhír 1 i gcrích, beidh an t-ábhar pacáistíochta adhmaid agus na coinsíneachtaí faoi seach a shonraítear:
 - (a) faoi mhaoirseacht chustaim de bhun Airteagal 134 de Rialachán (AE) Uimh. 952/2013; agus
 - (b) faoi mhaoirseacht ag na húdaráis inniúla.
- 4. De mhaolú ar mhír 3, féadfaidh an t-údarás custaim a cheadú nach gcoinneofar tráchtearraí sonraithe faoi mhaoirseacht dá bhforáiltear i bpointí (a) agus (b) den mhír sin, má scarann an t-oibreoir atá freagrach as an gcoinsíneacht an t-ábhar pacáistíochta adhmaid ó na tráchtearraí sonraithe sin, nuair is féidir go teicniúil.

Airteagal 5

Cinneadh Cur Chun Feidhme (AE) 2018/1137 a aisghairm

Aisghairtear Cinneadh Cur Chun Feidhme (AE) 2018/1137.

⁽⁵⁾ Rialachán (CEE) Uimh. 2658/87 ón gComhairle an 23 Iúil 1987 faoin ainmníocht taraife agus staitistiúil agus faoin gComhtharaif Chustaim (IO L 256, 7.9.1987, lch. 1).

*Airteagal 6***Teacht i bhfeidhm agus an tréimhse chur i bhfeidhm**

Tiocfaidh an Rialachán seo i bhfeidhm an fichiú lá tar éis lá a fhoilsithe in *Iris Oifigiúil an Aontais Eorpaigh*.

Beidh feidhm aige ón 1 Márta 2021 go dtí an 31 Nollaig 2023.

Beidh an Rialachán seo ina cheangal go huile agus go hiomlán agus beidh sé infheidhme go díreach i ngach Ballstát.

Arna dhéanamh sa Bhruiséil, 3 Feabhra 2021.

Thar ceann an Choimisiúin

An tUachtarán

Ursula VON DER LEYEN

IARSCRÍBHINN

Tráchtearraí sonraithe, cóid na hAinmníochta Comhcheangailte (AC) nó cóid TARIC agus an tír thionscnaimh faoi seach

Tuairisc ar an tráchtearra	Cóid na hAinmníochta Comhcheangailte (AC) nó cóid TARIC	Tír thionscnaimh
Slinn, bíodh sí bearrtha go garbh nó go díreach gearrtha, trína sábhadh nó trína gearradh ar bhealach eile, ina bloic nó ina leaca i bhfoirm dhronuilleogach (lena n-áirítear i bhfoirm chearnógach)	2514	An Bhealarúis, an tSín, an India
Marmar, trabhairtín, ecaussine agus cloch chailcreach i gcomhair leac chuimhne nó cloch chailcreach thógála eile ar 2,5 nó níos mó a n-imtharraingt shonrach dhealraitheach, agus albastar, bídís bearrtha go garbh nó go díreach gearrtha, trína sábhadh nó trína ngearradh ar bhealach eile, ina mbloic nó ina leaca i bhfoirm dhronuilleogach (lena n-áirítear i bhfoirm chearnógach)	2515	An Bhealarúis, an tSín, an India
Eibhear, porfaire, basalt, gaineamhchloch agus cloch i gcomhair leac chuimhne nó cloch thógála eile, bídís bearrtha go garbh nó go díreach gearrtha, trína sábhadh nó trína ngearradh ar bhealach eile, ina mbloic nó ina leaca i bhfoirm dhronuilleogach (lena n-áirítear i bhfoirm chearnógach)	2516	An Bhealarúis, an tSín, an India
Connadh, ina spreotaí, ina bhilléid, ina chipíní, ina bhrosna, nó i bhfoirmeacha comhchosúla; adhmaid i sliseanna nó i gcáithníní; min saibh agus fuíolladhmaid agus dramhadhmaid, bíodh sé ceirtleánaithe i bhfoirm spreotaí, bricíní nó millíní nó i bhfoirmeacha dá samhail, nó ná bíodh	4401	An Bhealarúis, an tSín, an India
Cásanna pacála, boscaí, cliathbhoscaí, drumáí agus pacáiste comhchosúil, déanta as adhmaid; drumáí cáblaí, déanta as adhmaid; sráideoga, sráideoga bosca agus boird ualaigh eile, déanta as adhmaid; coiléir sráideoige, déanta as adhmaid (seachas coimeádáin atá saindeartha agus feisithe le haghaidh modh iompair amháin nó níos mó)	4415	An Bhealarúis, an tSín, an India
Seiteanna, clocha colbha agus leaca, déanta as cloch nádúrtha (seachas slinn)	6801	An Bhealarúis, an tSín, an India
Clocha shaoirsithe ornáidíochta nó tógála (seachas slinn) agus earraí déanta astu sin, seachas táirgí faoi cheannteideal 6801; ciúbanna mósáice agus a leithéidí, déanta as cloch nádúrtha (lena n-áirítear slinn), bídís ar ábhar taca nó ná bídís; gráinníní, sliseanna agus púdar déanta as cloch nádúrtha (lena n-áirítear slinn) atá daite go saorga	6802	An Bhealarúis, an tSín, an India
Slinn shaoirsithe agus earraí slinne nó earraí slinne ceirtleánaithe (seachas gráinníní slinn, sliseanna agus púdar, ciúbanna mósáice agus a leithéidí, pinn slinn, agus slinnnte nó cláir atá réidh le húsáid agus a bhfuil dromchlaí scríbhneoireachta nó tarraingthe orthu)	6803	An Bhealarúis, an tSín, an India
Leaca agus pábháil, tileanna teallaigh nó balla ceirmeacha; ciúbanna mósáice ceirmeacha agus a leithéid, bídís ar ábhar taca nó ná bídís (seachas min shiliciúil iontaise nó créanna siliciúla comhchosúla, earraí frithleighis, tileanna atá oiriúnaithe go sonrach mar mhataí boird, nithe ornáideacha agus tileanna a mhonaraítear go sonrach le haghaidh sorn)	6907	An Bhealarúis, an tSín, an India
Plátaí, leatháin agus stiallacha alúmanaim	7606	An Bhealarúis, an tSín, an India